

Nunamiu kapisilinnik tukertitsivinnik pilersitsisoqarsinnaalernissaanik periarfissassat suunersut pillugu Naalakkersuisut UKA2022-mut Nalunaarusioqqullugit Inatsisartut aalajangiiffigisassaattut siunnersut

(Siverth K. Heilmann, Atassut)

Akissuteqaat

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

Siullermeerneqarnera

Naalakkersuisut siunnersummut saqqummiunneqartumut qujapput.

Naalakkersuisut isumaqarput, suliffeqarfiiit ingerlatassanut misilerarusussinnaasaminut tunngatillugu periarfissanik killiliisunillu namminneerlutik nalilersuisinnaanerusut.

Taamaalilluni Naalakkersuisut tassaasariaqanngillat nunatsinni kapisilinnik tukertitsiveqarnissamut periarfissat pillugit nassuaammik saqqummiisussat, akerlinganilli suliffeqarfiiit namminneerlutik nalilersuinernik misissuinernillu suliaqartussaasut. Taamaalilluni suliffeqarfiiit immikkut ilisimasalinnik tatigisaminnik aammalu suliaqarnernut pineqartunut, kiisalu ingerlatassanut suliffeqarfiiup misilerarusutaannut, ilisimasaqarnerpaasutut nalilikkaminnik akuutitsinissamut periarfissaqassaput.

Nunami aalisakkanik uumatisivinni kapisilinnik tukertitsiveqarnissamut pisariaqartinneqartut ilaagaat: illutassanik tukertitsivittaqtunik pilersitsinissaq, tukertitsiviit kiassarnissaat, pinngortitap ataqatigiinnerani pilersitanik allanngutsaaliuinissaq, erngup eqqortumik pitsaassuseqarnissaa, kaaviaartitseqqittarnermut teknologii, saliisarfiiit, ilaalu ilanngullugit. Taakku saniatigut suliffeqarfiiit isumaliutersuuteqarneranni ilaatinneqartussaasariaqartut ilagaat pilersaarusiornermut tunngatillugu najukkami pissutsit, innaallagiamik imermillu atugassaqarneq, sulisussarsisinnaaneq, tunisinissamut periarfissat akigitallu, ilisimasanik teknologiimillu pisariaqartumik periarfissaqarnissaq ilaalu ilanngullugit.

Taamanikkut Namminersornerullutik Oqartussat Qorlortorsuarmi misileraalluni suliniummik 1989-mi aallartitsipput, tassani nunami eqalunnik tukertitsiveqarnissaq aningaasaqarnikkut ajornannginnersoq misissorneqartussaasimalluni. Suliniut iluatsinngilaq, nunattalu karsianut 37 millioner koruuninik akeqarsimalluni.

Naalakkersuisut suliffeqarfiiit ingerlatassanik nutaanik misileraanissamik kissaateqartut tapersorusuppaat. Taamaattumik Naalakkersuisut Innovation Greenlandimut kiffartuussinissamut isumaqatigiissuteqarnikkut inuussutissarsiortunut siunnersuisarnermut inuussutissarsiutinullu tapersisarnermut aningaasanik immikkoortitsereerput. Suliffeqarfiiit nunami kapisilinnik tukertitsiveqarnissamut periarfissanik misissuinissamik kissaateqartut taamaalillutik, Innovation Greenland aqqutigalugu, ingerlatassaminnut siunnersorneqarnissamik tapersiivigineqarnissamillu ujartuisinnaapput.

Naalakkersuisut suliassaat tassaavoq suliffeqarfinnut nunami kapisilinnik tukertitsivimmik aallartitsinissamik kissaateqartunut pitsaasunik, aalajangersimasunik takorlooruminartunillu sinaakkutissaqarnissaannik qulakkeerinissaq. Nunami kapisilinnik tukertitsiveqarnermut

tunngatillugu imaluunniit allatut uumatisiveqarnermut tunngatillugu inatsisinik allanngortitsinissaq pisariaqartoq paasinarsissappat, tamatumunnga tunngatillugu Naalakkersuisut akuersaartumik inissisimapput. Kapisilinnik piujuartitsinissamut Atlantikup avannaani kattuffimmi (NASCO) ilaasortaanitsinni arlalinnik pisussaaffeqarpugut, tukertitsiveqarnermut tunngatillugu inatsisitigut naammassineqartussanik, soorlu nakkutiginninneq, nalunaarusiortarneq aammalu nappaateqarunnaarsitsisarnermut tunngatillugu pisussaaffeqarluta. Aalisarneq pillugu ataatsimiitaliarsuup isumaliutissiissummini inassutigaa imaani uumatisiveqarnermut suliassaqarfimmi eqaannerusumik ataatsimoortumik periaaseqalernissaq eqqarsaatigalugu suliassanik suliarinnittarnermi ataasiinnarmik saaffiginniffeqarsinnaaneq atuutilersinneqartariaqartoq.

Siunnersuut maannakkut ilusimisut iluseqarluni akuerineqassappat, Naalakkersuisut nassuaammik suliaqarnissamut, nunami kapisilinnik tukertitsiveqarnerup iluani immikkut ilisimasalinnik avataaneersunik sulisussarsiniartariaqartussaapput. Ukiup affaani sulisussamut sinaakkutissatut missiliorneqartoq naammasanersoq qularnarpoq. Nunatsinni nunami kapisilinnik tukertitsiveqarnissamut periafissat pillugit nassuaat qanoq pisoqaraluarpualluunniit aningaasartuuteqarnerunermik malitseqartussaavoq, aningaasanullu inatsimmi missingersuutini maanna ilanngunneqarsimangitsunik. Aalajangiiffigisassatut siunnersuut ilusimisut iluseqartillugu akuerineqassappat, aalajangiiffigisassatut siunnersuutip aningaasalersorneqarnissaata 2022-mut Aningaasanut Inatsisissaq pillugu isumaqatiginninniarnerni ilaatinneqarnissaa Naalakkersuisut sulissutigissavaat.

Taama oqaaseqarlutik Naalakkersuisut allannguutissatut siunnersuut maanna inassutigaat:

"Nunami imaanilu uumatisiveqarneq pillugu inatsisitigut malitassanik misissusoqarnissaanik Naalakkersuisut peqquneqarnissaat pillugu inatsisartut aalajangiiffigisassaattut siunnersuut."